

Ammentu de Eduardo Blasco Ferrer¹ (1956-2017)

A EDUARDO Blasco Ferrer l'apo bidu pro sa prima borta in Casteddu in su 2014. Nos semus addobiaos in s'ufitziu suo in s'universidade: fimus in Agustu e b'aiat calore, Eduardo no at pèrdiu tempus e m'at faveddau comente chi nos esseremus connotos dae semper. In su matessi tempus m'at fintzas fatu cumprènder chi no fit a nos istentare meda e m'at saludau deretu a pustis dimandau su chi li bisonzabat.

Chin su tempus apo imparau a lu connoscher e apo cumpresu chi Edu (gai si cheriat mutiu dae amicos e cumpanzos) fit gai: tancau in d-unu mundu de pessamentos e progetos chi non podiat o cheriat partire chin sos àteros ma fintzas capassu de sinzos de bonu coro, chi sa zente non semper comprendiat e chi fortzis, cada tantu, no apo cumpresu nem-mancu deo.

In custas pacas paràgulas chi so chircande de isterrer pro l'amentare no poto non tenner in cussideru s'esperientzia umana, a bortas difitzile, chi apo àpiu chin issu e sa tristura de non li poder torrare gràssias pro sas

¹ Eduardo Blasco Ferrer, miembru del conseyu científicu de la *Revista de Filología Asturiana*, falleció'l 12 de xineru de 2017. Catalán de nacementu, foi ún de los más prestixosos especialistas en llingua sarda, como profesor na Università de Cagliari (Cerdeña). Simone Pisano, investigador de la Università Guiglielmo Marconi de Roma, tuvo la xentileza d'escibir nel so honor esta necrológica en llingua sarda.

possibilidades mannas chi issu m'at dau de crescher comente linguista fintzas dandemi s'occasione de trattare chin istudiais balentes, mascamente de s'Acadèmia tedesca.

Eduardo non fit petzi òmine difitzile, ma peri prenu de unu bonu grabbu agreste e birgonzосу; Eduardo est istau unu linguista e unu filòlogu de iscola e de competèntzia manna chi at regalau a sa Sardinna òperas chi ant sustàntzia e importu pro totus sos chi istudiant su sardu e, prus in zenerale, sas limbas neo-latinas.

Aiat istudiau Linguística Romanza in s'universidade de Erlangen ube si fit laureau e adotorau. Est istau insinnante in Tàtari, Bonn, Firentze, München, e in Casteddu, innantis comente letore de catalanu e a pustis comente professore ordinàriu de Linguística italiana e sarda dae su 1996.

Moghende dae s'impinnu pro sa limba mama sua si fit interessau a s'eteroglossia catalana de s'Alighera chin sa monografia *Grammatica storica del catalano e dei suoi dialetti con speciale riguardo all'algherese* (1984) ma, in su matessi mamentu, si fit acurtziau a su sardu e su sardu, si podet narrer, l'at mantesu in faina fintzas a sa morte.

In prus de trint'annos de atividade Eduardo s'est impinnau in setores nobos pro sa linguística in Sardinna, traballande pro afortire sos istùdios de didàtica de sa limba e s'anàlisi sotziolinguística. Ma pro chie comente a mimme at cumintzau a connoscher sa cumpressidade de s'ispàtziu linguísticu sardu leghende sos libros suos e sos de su mastru mannu de sa linguística sarda Max Leopold Wagner, sunt monografias che *Storia linguistica della Sardegna* (Tübingen 1984); *La lingua Sarda Contemporanea: Grammatica del logudorese e del campidanese* (1986) e *Ello, Ellus Grammatica della lingua Sarda* (1994) chi abbarrant prus craras in sa memòria. E fortzis, a su mancu pro mene, sunt pròpiu sos istùdios de linguística istòrica e de dialetologia chi sunt diventaos belle cràssicos pro totus sos chi cherent connoscher sa cumpressidade diatòpica de su sardu.

De custu impinnu, a contu meu, s'òpera de balore issientìficu prus mannu abbarat su traballu chi aiat ammaniau issupra sos limbazos, galu pacu connotos, de s'Ozastra: *Le parlate dell'alta Ogliastra: analisi dialettologica, saggio di storia linguistica e culturale*.

A limbazos galu pacos connotos aiat dedicau chircas chi nos ant peri intregau una connoschèntzia de fatos importantes de morfologia verbale: chene m'illonghiare tropu apo a mentovare inoche petzi un'esèmpiu chi mi paret làdinu: in su volume *Linguistica sarda: storia, metodi, problemi* (2002) aiat documentau una perifrasi pro sa formatzione de su condizionale chi s'intendet in su Barigadu e in carchi cussorja de Barbaza (p.es. Teti e Austis) est a narrer su tipu: Samugheo [pía βólle]; Busache [appía kkérre] '(deo) dia cherrer' in ube su morfema chi espressat su condizionale Samugheo, Busache (*ap*)pía (chin afèresi in Samugheo) benit dae sa rucadura de sa forma de su presente indicativu *apo* chin sa de s'imperfetu indicativu *aia*.

Custu aficu mannu in sa chirca de sos informadores e, mascamente, in sa cullia de sos datos dialetales in su campu at dau fortza noba a sos istùdios de dialettologia in Sardinna, istùdios chi commo, a dolu mannu, ant pèrdiu unu de sos pacos istudiais de gabbale.

Comente filòlogu Eduardu si fit ocupau fintzas de sa publicazione de sos documentos iscritos de su sardu anticu (cfr. *Crestomazia sarda dei primi secoli* de su 2003). Fintzas cando capitat (e, de rechente, est capitau a mimme puru) de no esser de acordu chin d-unas cantas interpretassiones suas, bisonzat a su mancu de li dare su mèritu de aer mantesu semper biba sa discussione issupra fatos de su medioevu chi pariant acaraos dae tempus meda. Fintzas cando no semus de acordu, su parrer suo cheret semper ascurtau, a su mancu pro nos cumbincher de aer picau in cussideru totu sas possibilidades.

In sos ùrtimos annos Eduardo fit impinnau chircande de facher essire a campu sos secretos prus cubaos de su sostratu prelatinu (cfr. *Paleosardo*.

Le radici linguistiche della Sardegna neolitica de su 2010). Una chirca ispantosa, chi non semper at cumbintu sos espertos, ma chi at postu in campu nobas ipòtesis e at fintzas dau carchi acaramentu de importu mascamente in sa toponomàstica de Sardinna.

Fachet fintzas dolu chi issu non potat bier s'essida de s'ùrtimu traballu suo chi aiat curau paris chin Daniela Marzo e Peter Koch (chi, issu puru, nos at lassau tropu chito): *Manuale di Linguistica sarda* ube sunt cullios artìculos de espertos sardos, italianos e europeos.

Sa sua fit una boche crítica chi dabat peri irfadu e istrobbu, forzis pro sa manera chi aiat de cuntierrare non petzi chin sos collegas ma fintzas chin sos amicos suos; una boche chi at a mancare in Sardinna, in Itàlia, in Europa e in cada tretu ube b'at istudias e amantes de sa limba sarda.

SIMONE PISANO

Universidade Guglielmo Marconi (Roma)



Universidá d'Uviéu
Seminariu de Filoloxía Asturiana



ISSN 1578-9853



17

9 771578 985006